

NIGITIWATAALE LIWAKATE JOÃO

João ayemaa me iditini liboonagadi nigica lapo loiigi Cristo ane didikotibige leegodi nigicoa nokododi oiatetibeci loiigi Cristo. Joanigidaa leegodi meyatigi me “Niotagodo” nigica lapo loiigi Cristo ane didikotibige.

Eo loniciwaga me dinemaatiwage codaa midioka limedi modiatece niigaxinaganegeco anewi. Codaa eo leemidi me dogodibatege niigaxinaganegeco ane degewiteda, otegexaagaga odibatege digidiaagi ligeladi niginoa niigaxinaganadi awitakagaga.

¹Ee ane ee oxiiigodi lacilo loiigi Cristo, jiditibigagaji nagadi notaganagaxi, iniotagodo ane gadixipenitedice Aneotedogoji. Codaa jidikotibige gadionigipi ane jemaa leegodi gotiwagatakanegegi anewi. Agemokeeta me gademaanitiwaji, pida inatawece nigina oko anoyowoogodi anewi, aagagetigademaanitiwaji. ²Gademaanegegitiwaji leegodi nigida gotiwagatakanegegi anewi, anida mokotaga, codaa idioka limedi mida mokotaga. ³Jemaa Aneotedogoji Godiodi, codaa me Goniotagodi Jesus Cristo, Lionigi Godiodi, midioka limedi mowo aneletagadomitiwaji, metigadiwikodeni, codaa mowo mele gadaalegenali. Odaa jigidaagee idioka limedi me iwagatitiwaji anewi, codaa madinemaanitiwage.

Leeditibige mejiwagataga anewi, codaa me idinemaanagatiwage

⁴Eliodi me idinitibece nigijo naga jibodice midi gadionigipi anodiatece niigaxinaganegegi anewi, ane niigetedogowa Godiodi me jaoga.

⁵Natigide iniotagodo, jipokotagawa me idinemaanagatiwage okotawece. Ajiditibigagaji niigenatakanegegi gela, pida jiditibigagajitiwaji nigijo anakaagida me goniigenatakanegegi nigijo noko maleekoka jinakatonagateda Goniotagodi. ⁶Nigida moko idinemaanagatiwage nigina mejiwagataga liigenatakanegeco Aneotedogoji, codaa jigidaa liigenatakanegegi anajipaataatiwaji nigijo maleekoka anakatoniteda Goniotagodi, midioka limedi madinemaanitiwage.

⁷Igaataga jegeliodi nigina anoninaaletiniwace oko ilaagiteloco nigina iigo, nigina anodi Jesus Cristo me degenagiteda digoina iigo me liciagi goneleegiwa. Nigina oko anee niginoa notaga ninaaletiniwace oko, codaa

laxakawa Cristo. ⁸Adinowetitiwaji adaganiadi gobakedi, pida amaleegaga jibagatege loojedi gobakedi Aneotedogoji anicota me najigotedogowa.

⁹Nigina oko ane dioteci eletidi niigaxinaganegeco, Cristo ane daga godiigaxitetece anoyalagata gotiwagatakanegegi, joaniginiaagini nigini oko agicoa Aneotedogoji minitaga. Pida nigina oko anidioka limedi me diotece liigaxinaganegeco Cristo, odaa Aneotedogoji Godiodi, codaa me Jesus ane Lionigi, iniwa minitaga. ¹⁰Digicatibece oko anigo makaamitagatiwaji diigaxinagatece nigijo Cristo ane daga diigaxinagatetece, jinagabaatege catiwedi gadigeladi, codaa jinaga gadecoatitece micataga daga ganioxoa. ¹¹Igaataga nigica oko ane nice, odaa dice lokaagedi mowo ane beyagi.

Owidijedi notaga

¹²Eginoateda owidi ane domaga ejitedagawatiwaji, pida ajiditedini, igaataga inibeotege me idalitagawatiwaji, me eetawece me gadotaganegenitiwaji, amaleegaga jakadi makaami inikawepodi.

¹³Lionigipi ganioxoa, nagajo ane ixipetedice Aneotedogoji me nebi, iditawece oyecoaditibigajaji. Odaa jigidaagee. (Amém).